

# LEGAE LA GAGO LE KAE ?

Bontsi jwa rona bo na le legae, gongwe felo fa go bidiwang legae. Le ha e bile e se legae le lentle jaaka a mangwe, le ha le sa tlaa dithoto jaaka a mangwe, le ha e se legae la boiketlo jaaka a mangwe, mo go rona, ke lona legae. Le ha re ka etela kae le kae, ke boitumelo jo bogolo mo go rona go boela kwa legaeng la rona. Le ha mafelo a mangwe a re ka a eteleng a ka nna mantle gongwe monate bogolo go legae la rona, mafelo ao ga se legae mo go rona. Legae la rona le ne le ntse le re gwetlha. Go sengwe kwa gae se se re okang, le se re dirang gore re ikutlwe gore re batho ba fa.

## MONO RE BAENG FELA

Lefoko la Modimo le re bolella gore mono re baeng le baeti fela. (1 Pet. 2:11; Baheb. 11:13). Magae a rona a mono, le ha a ka ne a agegile bontle jang, ke a sebakanyana fela. Ka lobakanyana dipota di tla bo di simolla go phanyega, dithulelo di simolla go dutla, phefo e tla simolla go tsena ka mabati le difenstere. Morago ga sebakanyana bodilo le jona bo tla simolla go kgomarologa, mme ntlo e tla wa ka iketlo rure. Ga go na kago epe mo lefatsheng leno e e salelang rure, nnya, ke dikago tsa sebakanyana, morago ke matlotla le ditholobolo. Gadima dintlheng tsothe tsa gago, mme o tla bona ditshupo tse di supang gore ga go sepe sa lefatshe leno, se se salelang rure. Dilo tsothe di a feta.



di a fela, ehe, le ona magae a rona.

## **LE HA GO LE JALO MONGWE LE MONGWE O NA LE LEGAE LA TLHOMAMO**

A re a itse gongwe ga re itse, le fa go ntse jalo mongwe le mongwe wa rona o na le legae la tlhomamo, legae le le sa khutleng. Magae ao ke ona a re yang kwa go ona ha maphelo a rona a khutla mo lefatsheng leno, ha mebele ya rona e ladiwa mo phuphung. Foo mewa ya rona yona e ya magaeng a rona, a re seng baeng kwa teng, kwa re tla nnang teng ka gale le ka gale. Legae le lengwe re utlwa mo go Tshenolo 20:10-15 gore ke letsha la mollo le sebabole kwa go leng sebata le moporofita wa tsietsi. Ga twe Satane o tla kgoromelediwa mo go lona, le batho botlhe ba maina a bona a seng teng mo Bukeng ya botshelo, ba tla kgoromelediwa teng. Mo gare ga dintelo tse di thata tse tsa mollo, mo gareng ga mogote o o tlhokofatsang o, go tla nna sello le khuranyo ya meno. Sefatihego se se befileng sa ga Satane, le setshego se se maswe sa bademona, di tla bifisa legae leo bogolobogolo. Kgomotso ga e kitla e nna teng, le thuso ga e kitla e nna teng. Barogwi ba tla bo ba le nosi mo tlhokofatsong ya bona, mme ba tla ikwathaya ha ba ganne go reetsa Efangedi ya ga Jesu Kreste. Dintelo tse tsa mollo, felo fa ga tlhokofatso, molete o wa mollo, e tla nna lona legae la bona, gonne: "Botlhe ba leofile, mme ba thaelwa ke kgalalelo ya Modimo." (Bar. 3:23). Le ke lona legae la bagokafadi, le baakafadi, le baitshekologi, le baobamedi ba medimo ya seseto, le ba mereo, le ba ba tletseng kilo, le lefufa, le baaki, le matagwa, le bautswi, le batsietsi, le ba ba sa ikanyegeng, le ba bolai, le barati ba ntwana, le ditshwakga, le ba ikgodisi, le barati ba dilo tsa lefatshe, le baba sethogo, le ba ba megagaru, le barati ba madi. (Bagal. 5:19-21; Tshenolo 21:8). Le ke lona legae la batho ba ba ganneng go amogela Morena Jesu Krisete gore a nne Mopholosi wa bona, ba ba sa thatswiwang ka Madi a ga Jesu. "Lo se tsiediwe, Modimo ga O sotlwe, se motho a se jalang, o tla kotula ga sona." (Bagal. 6:7). Se re se jalang jaanong mo kgatlhegong ya nama, re tla se kotula mo moleteng.

A o ko o eme, o ele tlhoko kafa moleofi a yang legaeng le ka teng. Legae le, ke la gagwe, gonne ga ise a ke a amogele Mopholosi. Moleofi yo o pelo e thata, o ya kwa losong ka mmele o o tletseng ditlhabi, le ka pelo e e tletseng poifo. Loso lo mo tlela ka nako e a sa lebelang, le e a sa eletseng, mme o leba loso jaaka mmaba yo o setlhogo. Maitumediso a sebe a fedile, jaanong o tshwanetse go amogela tuelo e e boitshegang ya sebe. Ditsenene tsa molete di tlhaba moya wa gagwe o o mo poifong. Le ha a ka eletsana go rapela, o a palelwa ke go kopana le Modimo. Ditsala tsa gagwe di tshaba go ema gaufe le bolao jwa gagwe jwa loso, mafoko a bona a a loleya a palelwa ke go mo gomotsa. Lehumo la gagwe le motlhamongwe a le bapetseng ka bolotsana le palelwa ke go rekolola moya wa gagwe, ehe, le palelwa ke go thetsebatsa ditsenene tsa gagwe, le go otlolola malatsi a bophelo jwa gagwe. Ha a leka go ikgopotsa Modimo diabolole mmaba ga mo nae sebaka. Sengwe le sengwe se a neng a se rata mo lefatsheng leno, se a mo nyonnyobetsa, ehe, le badisa ba gagwe ba maaka, bapalelwa ke go mo thusa. Foo o simolola go lemoga gore i **ke se boitshegang go wela mo mabogong a Modimo o o phedileng.** (Baheb. 10:31). O ne a itsholofeditse gore o tla ruana le Modimo mo nakong

ya loso, jaanong o lemoga gore sebaka se fitile. Dikete tsa batho di swa ka tshoganyetso di sa bona sebaka sa go batla Modimo mo bolaong jwa loso. Ka go le jalo, rea tlhagisiwa gore re batle Modimo O sa ntse O ka bonwa Mo beomong jwa go utlwa lefoko la kgomotso la Modimo, moswi yo wa moleofi yo o neng a le kgathanong le Modimo le tshogofatso ya Ona bophelo jothle jwa gagwe, jaanong o tshwanetse go utlwa lentsewe la Moatlhodi, yo o leng Ene Mopholosi yole motho a mo ganneng. Moleofi yole wa batho jaanong c tshwanetse go utlwa katlholo e e reng: Ntlogele morogwi ke wena, o ye kwa mollong o o sa khutleng, o o baakanyeditsweng Satane le baengedi ba gagwe. (Math. 25:41). Motho o laoletsewe go swa gangwe fela, morago ga moo go tla tshekiso. (Baheb. 9:27).

## **JAANONG A RE LEBENG LEGAE LE LE SIAMENG**

Mo legaeng le, ga go na bosigo, ga go na dipone, letsatsi ga le batlege kwa teng, gonne Morena ke lesedi la kwa teng. (Tshenolo 22:5). Ga go bolwetsi kwa teng, ga go bothoko kwa teng, ga go tla le e seng lenyora, ga go yo o tlhokofaditsweng, ga go poifo, ga go loso. (Tshenolo 24:4). Dithako ke tsa diperele, motse wa teng ke gauta fela. (Tshenolo 21:18). Leitlho ga le ise le ke le bone, tsebe ga e ise e ke e utlwe, le gona ga go ise go ke go tsene sepe mo pelong sa dilo tse Modimo O di baakanyeditseng bona ba ba mo ratang. (1 Bakor. 2:9). Ga go na puo epe mo lefatsheng e motho a ka kgonang go tlhalosa kgalalelo e e kwa gae la legodimo — Le a gakgamatsa, le a galalela! Le ke lona legae la ba ba rekolotsweng. Ga go moleofi ope yo o tla gatang mo legaeng leo. Ga go kitla go tsena sepe se se leswafatsang, le e seng yo o dirang maswe, kgotsa yo o akang, ha e se ba ba Kwadihweng mo Bukeng ya Kwana ya botshelo. (Tshenolo 21:27). Ga o kake wa reka legae le ka madi le ha e le ka ditiro. Ga o kake wa tlolela ka dithako tsa teng. Ga go na thulanganyo epe ya Kereke, e e ka go nayang legae le. Tsela ya go tsena mo legaeng le, engwe fela. **Tsela eo ke Jesu.** O buile jalo Jesu a re: Ke nna tsela le nnete, le bophelo, ga go yo o ka tlang kwa go Rre, ha e se ka Nna. (Joh. 14:6). Jesu O re bolella mo go Joh. 14:2 kaga legae le a le baakanyang. Legae le, ke la bona fela ba ba itshwaretsweng, le ba dipelo di boitshepo. Bontsi bo apara diaparo tsa gore, ba solofela gore diaparo tseo di tla ba tsenya mo legodimong. Nnya, ke pelo e e batlang go itshepisiwa godimo ga dilo tsotlhe. Le gona re tshwanetse go phela bophelo jo bo itshepileng, e seng go utlwana le lefatsho leno.

Ka go bonala sentle gore rotlhe re baleofi fa pele ga maitlho a Modimo, mme rotlhe re tshwanelwa ke molete wa mollo, go tsela e le ngwe fela e re ka e dirang: "Ha re ipobola dibe tsa rona, o boikanyo le tshiamo ya go re itshwarela dibe, le go re itshepisa mo tshiamololong tsotlhe. (1 Joh. 1:9). Jesu a re: Ke nna tsogo le bophelo, yo o dumelang mo go nna, le ha a ne a sule, o tla phela. Le ha a le mang mang yo o phedieng a dumela mo go nna ga a kitla a swa. (Joh. 11:25,26). Yo o utlwang lefoko la me, a dumela ene yo o nthomileng, o na le bophelo jo bo sa kutleng, ga a kitla a tla mo tshekisong, o kgabagantse loso o ile bophelong. Loso ga le kake la boifisa le e seng go tlhokofatsa Mokrisete wa nnete. Loso le meditswe ke phenyo. Loso lobolela lwa gago lo kae? Bobipo phenyo ya gago e kae? A Modimo O lebogwe o



o re neileng phenyo ka Jesu Krisete. (1 Bakor. 15:54-57). Motho yo o phedileng, a sepela le Modimo ga a boife loso. Ha nako ya go fuduga ga gagwe e tla, o tla sepela ka boitumelo; jaaka Paulo Moapostole a bua a re: Ke na le keletso ya go tsamaya le go ya go nna le Krisete, ke se se molemo mo go nna. (Bafil. 1:23). Mokrisete wa nnete o na le tihologelelo ya go bona sefathihego sa ga Jesu yo o mo rekolotseng ka go mo swela mo sefapaanong. Moya o o Boitshepo le ona o mo gakolola mafoko a ga Jesu a a reng: **“A dipelo tsa lona di se fuduge, lo dumela mo Modimong, le mo go nna dumelang. Maago a mantsi mo tlung ya ga Rre. Ke tla boa ke lo itseela, gore kwa ke gona le lona le nne gona.** (Joh. 14:1-4).

Jaanong a re ke re eme go le gonnye, re ke re thothomise gore Mokrisete a ka fittha jang kwa gae. Boemong jwa loso lo lo boitshegang, re bona moengedi, gongwe morongwa wa Modimo a eme a letile go belega mosiamisiwi gae kwa Modimong. Moya le motho-wa-teng, o gololwa mo mmeleng o o swang, o tsena ka dikgoro tsa legodimo, o ya kwa sehubeng sa Ene yo moya wa gagwe o mo ratileng, wa mo phelela le go mo swela mo lefatsheng leno. Koo o amogelwa ka lethabo fa pele ga Modimo ke Morena ka mafoko a a reng: “O dirile sentle mothanka yo o boikanyo, tsena mo boitumelong jwa Morena wa gago.” (Math. 25:21). Satane ga tihole a na le thata epe mo go ene, gonne: Loso lwa moitshepi lo a ratega fa pele ga Morena wa gagwe. (Pes. 116:15). Mme ka utlwa lentswe le tswa mo legodimong le nthaya le re: Kwala, Go sego baswi ba ba swelang mo Moreneng, go tloga jaanong, go bua Morena, gore ba ikhutse mo tirong tsa bona gonne ditiro tsa bona di a ba latela. (Tshenolo 14:13).

A go o kake wa dira jaaka morwa wa tatlhego yo o rileng a le kgakala le legae, ya re a bona tatlhego le bothoko jwa gagwe a re: Ke tla nanoga jaanong ke boele kwa go rre. (Luka 15:18). Neela Jesu bophelo jwa gago jaanong fa o leng teng. Khubama ka mangole a gago o ipobole mo Modimong O mmolelle gore o moleofi, o mo kope gore a go ntlafatse ka Madi a gagwe, o mo dumele gore a tsene mo bophelong jwa gago. Neela Satane mokwatla wa gago. Neela ditsela tsotlhe tse di yang kwa go Satane mokwatla. Simolla jaanong o tsene mo tseleng e e yang legang la gago la legodimo.

*M.R. Gschwend.*

---

If you have found salvation in Christ, or have been otherwise blessed through our Gospel literature, please let us know. We would like to thank God with you, and remember you further in our prayers.

For **free** Gospel literature, books and tracts in over 540 languages, write to:

**E-MAIL: [info@angp.co.za](mailto:info@angp.co.za)**

**ALL NATIONS GOSPEL PUBLISHERS**

**P.O. Box 2191, PRETORIA, 0001, R.S.A.**

(A Gospel Literature Mission financed by donations)

(Reg. No. 1961/001798/08)